

Ipan eyi amatlajkuiloli tlen okijkuilo in tiotlatlanili

Juan

Nochtin otlapovayah kuali de Gayo

¹Ne, tlen nitlayakanki de toknivahtlaneltokakeh, nikijkuilova nin amatlajkuiloli para tejwatzi notlasojkaikni Gayo, porke yi neli nimitztlasojtla.

²Tejwatzi notlasojkaikni, nikmati nik tejwatzi tika kuali inavak toYejwatzi. Por eso niktajtlanilia in toYejwatzi ke nochi tlamantli tlan tejwatzi tikchiva ma kisa kuali. Niktajtlanilia xikpia chikavalistli itech mokuerpo iva itech moanima. ³Onikpixki miek pakilistli ijkuak ovalajkeh sekimeh toknivahtlaneltokakeh iva onechilvijkeh ke tikseguirova iva tinemi itech tlen melajkayotl. ⁴Amo onka itla oksé tlen okachi ma nechpakti, sino san yen ijkuak nikkaki ke nopilvah nemih itech tlen melajkayotl.

⁵Tejwatzi notlasojkaikni, sa tlawel kuali tlen tikchiva porke tikipalevia toknivahtlaneltokakeh, maski sekimeh amo tikinmixmati tlen vitzeh de okseka. ⁶Iva yejonmeh toknivahtlaneltokakeh nika kan timololovah iva otechilvijkeh kenik tikipalevia ika miek tlasojtlistli. Nimitztlatlavtia, xikinpalevi ijkuak oksemi yaskeh itech

inmojvi para amitla ma kinpolo itech ojtli, xikinpalevi ijkó kemi toYejwatzi kipaktia. ⁷Porke yejvah okiskeh para kitekipanoskeh toTeko Jesucristo, iva yejvah amo kinekih ma kinpalevikah tlen amo kixmati Dios. ⁸Por eso moneki tejvah tikinmitaskeh para tikipaleviskeh ika tlen yejvah kinpolova, para ijkó velis tisebantekipanoskeh itech tlen melajkayotl.

Diótrefes amo kuali iyelis

⁹Ne onikijkuilo se amatlajkuiloli para toknivahtlaneltokakeh tlen ompa mololovah kan tejwatzi tipovi, pero Diótrefes kineki yen tlanavatijtos entre imejvah, iva amo kineki techkakilis tlen tejvah tikiytovah. ¹⁰Por eso, ijkuak ne nias ompa, nimechilvis nochi tlen amo kuali tlen kichiva, porke techpojpojtinemi iva tlapojtinemi fiero de tejvah. Iva amo san yejón, sino noijki amo kineki kinselis in toknivahtlaneltokakeh tlen ompa onajsih. Iva tlen kinekih kinseliskeh in toknivahtlaneltokakeh, ye amo kinkavilia. Iva tlen teseliah ye kinkixtia para ayakmo semi invah ma povikah in tlaneltokakeh.

¹¹Tejwatzi notlasojkaikni, amo xikchiva tlen amo kuali kemi kichivah

in oksekimeh tlakah, sino xikchiva tlen kuali. Tlen kichiva tlen kuali kijtosneki povi inavak toYejwatzi, pero tlen kichiva tlen amo kuali kijtosneki amo kixmati in toYejwatzi.

Ichipavkanemilis in Demetrio

¹²Nochtin kuali tlapovah de Demetrio, iva itech inemilis motta nik yi neli tlen kijtovah de ye. Tejvah noijki kuali titlapovah de ye, iva imejvah inkimatih nik yi neli tlen tejvah tikjto vah.

Juan sa ik tlami okonintlajpalo

¹³Nikpia miek tlen nikneki nimitzilvis, pero amo nikneki nikijkuilos nochi itech nin amatlajkuiloli.

¹⁴Porke nikneki nias nimitzitati san nima, iva ijkuakó ompa velis timotlapoviskeh.

¹⁵Nikchia xieta ika kuali. Moyoliknivah tlen nika kateh mitzontlajpalovah. Iva ik ompa techonintlajpalili kada se de toyo-liknivah tlen ik ompa kateh.